

摘藻堂四庫全書薈要

集部

欽定四庫全書薈要卷一萬五千三百五十五

集部

景迂生集卷十八

宋晁以道撰

後記

題古周易後

周易卦爻一象二象三文言四繫辭五說卦六序卦七
雜卦八繕寫謹第如上按晉太康初發汲縣舊冢得古
簡編科斗文字散亂不可訓知獨周易最為明晰上下篇
與今正同別有陰陽說而無彖象文言繫辭杜預疑于時

仲尼造之於魯尚未播之遠國而漢藝文志易經十二篇施孟梁丘三家顏師古曰上下篇及十翼故十二篇是則象象文言繫辭始附卦爻而傳於漢歟先儒謂費直等專以象象文言參解易爻以象象文言雜入卦中者自費氏始其初費氏不列學官唯行民間至漢末陳元方鄭康成之徒皆學費氏古十二篇之易遂亡孔穎達又謂輔嗣之意象本釋經宜相附近分爻之象辭各附當爻則費氏初變亂古制時猶若今乾卦象象繫卦之

末歟古經始變於費氏而卒大亂於王弼惜哉奈何後
之儒生尤而效之杜氏分左氏傳於經宋衷范望輩散
太玄贊與測於八十一首之下是其明比也揆觀厥初乃如
古文尚書司馬遷班固序傳揚雄法言序篇云爾今民
間法言列序篇於其篇首與學官書不同槩可見也唐
李鼎祚又取序卦冠之卦首則又效小王之過也今悉
還其初庶幾學者不執象以徇卦不執象以徇爻云昔
韓宣子適魯見易象是古人以卦爻統名之曰象也故

曰易者象也其意深矣豈若後之人卦必以象明象必
以辭顯紛紛多歧哉嗚呼學者曾未之知也劉牧云小
象獨乾不繫於爻辭尊君也石守道亦曰孔子作象象
於六爻之前小象繫逐爻之下惟乾悉屬之於後者讓
也嗚呼他人尚何責哉若夫文字之傳始有齊楚之異
音卒有科斗籀篆隸書之四變因而訛謬者多矣劉向
嘗以中古文易經校施孟梁丘經至蜀李誤又嘗注古
文易則今之所傳者皆非古文也安得覩夫劉李之書

乎其幸而諸儒之傳今有所稽考者具列其異同舛訛
於字下亦庶幾乎同復於古也或曰子能古文何不以古
文寫之曰有改於華而無變於實者余不為也如古者
竹簡重大以經為二篇今又何必以二篇成帙哉謹錄
而藏諸以俟博古君子建中靖國元年辛巳五月二十
四日嵩山晁說之題

記京房易傳後

漢藝文志易京氏凡三種八十九篇隋經籍志有京章

句十卷又有占候十種七十三卷唐藝文志有京章句
十卷而占候存者五種二十三卷今其章句亡矣乃略
見於僧一行及李鼎祚之書而其傳者曰易傳三卷積
算雜占條例法一卷或共題易傳四卷而名皆與古不
同今所謂京氏易傳者或題曰京氏積算易傳疑隋唐
志之錯卦是也錯卦在隋七卷唐八卷所謂積算雜占
條例法者疑隋逆刺占灾異十二卷是也至唐逆刺三
卷而亡其九卷元祐八年高麗進書有京氏周易占十

卷疑隋志周易占十二卷是也自古易家有書而無師者多矣京氏之書幸而與存者才十之一尚何誰之師哉說之自元豐壬戌偶脫去舉子事業便有志學易而輒不好王氏妄以謂弼之外當自有名家者果得京氏傳而文字顛倒舛訛不可訓知逮其服習既久漸有所窺今三十有四年矣乃能以其象數辨正文字之謬於邊郡山房寂寞之中而私識之曰是書兆乾坤之二象以成八卦卦凡八變而六十有四於其往來升降之際

以觀消息盈虛於天地之元而酬酢乎萬物之表者炳
然在目也大抵辨三易運五行正四時謹二十四氣志七十
二候而位五星降二十八宿其進退以幾而為一卦之主者
謂之世奇偶相與據一以超二而為主之相者謂之應世之
所位而陰陽之肆者謂之飛陰陽肇乎所配乾與坤震與巽
坎與離艮與兌
而終不脫乎本以飛集卦之位
乃伏集宮之位以隱蹟佐神明者謂之
伏起乎世而周乎內外參乎本數以紀月者謂之建終
終始始極乎數而不可窮以紀日者謂之積會于中而

以四為用一卦備四卦者謂之互乾建甲子於初坤建
甲午於上八卦之上乃生一世之初一世之五位乃分
而為五世之位其五世之上乃為遊魂之世五世之初
乃為歸魂之世而歸魂之初乃生後卦之初其建剛日
則節氣柔日則中氣其數虛則二十有八盈則三十有
六蓋其可言者如此若夫象遺乎意意遺乎言則錯綜
其用唯變所適或兩相配而論內外二象若世與內

水草

火配位內離
火四世水

若世與外

困金木交爭外
兌金初世木

或不論內外二

象而論其內外之位

萃土水入艮兌初土四水

或三相參而論內外

與飛

賁土火木分陰陽艮土離火飛木

若伏

旅火土木入離艮離火艮土伏木

或相參

而論內外世應建伏

觀金土火木互為體建金世應內土伏火外木

不論內外

而論世建與飛伏

益金土入震巽世與飛土建與伏金

或兼論世應飛伏

復水土見候世應水土飛伏水土屯土木應象世應土木飛伏土木

或專論世應

夫金木合乾兌

入坤象世金應木蠱金木入艮巽世金應木

或論世之所忌

履金火入卦初九火九四火克

九五世金及乾之金 或論世之所生

巽火木與巽同宮世木巽木建火

於其所起

見其所滅

大壯起于子滅于亥

於其所刑見其所生

隨金木交刑水火相激兌

金
木

故曰死于位生於時死于時生於位苟非彰往而

察來微顯而闡幽者曷足以與此前是焦小黃變四千
九十有六卦後有管輅定乾之軌七百六十有八坤之
軌六百七十有二其知之者將可以語邵康節之易矣
彼小王之徒唯知尚其辭耳其謂斯何昔魯商瞿子木
受易孔子五傳而至漢田何子裝何授洛陽丁寬寬授
碭田王孫王孫授東海孟喜喜授梁焦贛延壽延壽授
房房授東海殷嘉河東姚平河南乘弘繇是易有京氏

之學而傳盛矣有翟牧白生者不肯京氏曰京非孟氏學也劉向亦疑京託之孟氏予不知當時為何說也今以當時之書驗之蓋有孟氏京房十一篇灾異孟氏京房六十六篇與夫京氏殷嘉十二篇同為一家之學則其源委孰可誣哉此亦學者不可不知也若小王者果何所授受耶蓋自京氏為王學有餘力而王學之適京氏則無由矣或傳是書而文字舛謬得以余言而攷諸今有不可就正者闕以待來哲積筭雜占條例法具如

別錄政和元年乙未五月庚辰嵩山晁說之記

題王深甫書傳後

王深甫布衣之友曰曾子固常彙甫其名官已顯而忘
年汲汲求友深甫於布衣中者曰劉原甫王介甫是五
人者皆歐陽公客也劉原甫自恃其才一旦由下國入
京師聲譽振大夫學士間直欲與歐陽公抗乃獨於深
甫厚矣古有談止之士謂衆人之談止於斯一人也當
是之時諸公席上之談往往止於介甫而介甫之談則

又為原甫而止也二人者俱於深甫則或有不得而行者矣彼五人商榷閭切之語今雖無聞焉而深甫於其所作書傳偶不出曾子固耳其三人則各以姓字載之或正其是非或略無所辨以視後之觀者深甫為人善取人而不攘人之善於是乎在矣雖然深甫善取人矣是亦不善於取人也歟何則書傳有珪璋特達褐而升襲而降之論則原甫之似也其薄險伏奇初欲奪人之軍而卒不自保其隻輪者彞甫之似也又有喜異務新掾

杙之酷拘攣之嚴者余不知其何所似也嗟夫惜也深甫既知堯之聰明文思光宅天下是亦舜之德所以為堯之克杜預之於左氏范甯之於穀梁毛萇之于詩郭璞之於爾雅完然成一家之學後世雖有作者未易加也余既繕寫弼書并以記之政和乙未十月丁丑嵩山晁說之廊時記

題寫本老子後

此書故題曰老子道德經勝於分道德為兩經者其文

字稍近古特錄之自便觀覽竊惟伏羲文王周公贊易之後惟老氏得易之變通屈伸知柔而貴虛務應而不得殷勤以立言幸乎此書之存也逮夫孔子繫易之後此書則為一偏之言矣責賢者備也世猶有老易之稱奈何建炎二年戊申八月五日海陵旅舍嵩山晁說之題

曾子後記

漢藝文志曾子十八篇隋志曾子二卷目一卷唐志曾

子二卷今世所傳曾子二卷十篇蓋唐本也有題曰傳
紹述本者蓋唐樊紹述歟視隋亡目一卷視漢亡八篇
矣然此十篇之書號曰曾子者乃見於大戴禮矣漢有
禮經七十篇后時未有大小戴之分不知曾子在其中
歟漢志因劉向父子所錄而著之既於儒家有曾子十
八篇疑不至重複也隋志因盧植鄭玄分注大小戴禮
之後各錄其書曾子遂存於大戴禮歟唐志實因而錄
之然隋唐志亦自有曾子尚仍漢之舊歟隋唐中秘書

官無歆向父子以甄別之歟小戴禮先錄中庸經解二書其後馬融又錄月令明堂位樂記三書則大戴禮錄曾子及夏小正二書無足疑者逮夫儀禮錄喪服子夏傳孔叢子錄小爾雅之類皆一體也嗚呼三代之書其不泯而傳於今者幸也尚敢條理纖悉之望耶然不條理纖悉之則非學者事也余病世之人莫不尊事孟子而知子思中庸者蓋寡知子思中庸者雖寡而知讀曾子者殆未見其人也宜其文字回舛謬悞輒以家藏曾

子與溫公所藏大戴禮參校頗是正因著其本末而盧注遂行於魯子云政和乙未七月八日乙亥嵩山晁說之鄜時記

題長編疑事

長編者溫公資治通鑑藁草之私號也溫公自洛中以所修藁草寄其屬官南康軍監酒劉道原而自名之歟抑道原之名歟道原日誦萬言而勤廢飲食寢處遂忘其身之流落而家寒餓也其忠憤耿介當熙寧初不為

大丞相毫髮少貶者雖自其天姿亦博學精思之助哉
觀斯疑事則其閎遠沉粹之躅亦略可見矣通鑑之為
書有賢傑輔相攻堅析微如此安得不善耶惜其初不
自珍而公卧病二年之久家人卑弱憂瘁之中幸而存
者姑五十有五種也公之子義仲壯輿政和戊戌為唐
州曹官錄以寄說之東里草堂初拜嘉而不甚器之以
壯輿作資治通鑑攷異待其異日之成書也今壯輿死
已累年斯事已矣誰能措手不覺涕淚無從漬於殘缺

僅存之書嗟嗟良友奕世厚善之意實存於其中也重
惟壯輿臨終屬我銘其墓久難之未就乃先以攄予之
哀云宣和五年癸卯五月二十六日戊寅嵩山晁說之
題

康節先生謚議後記

說之大觀四年庚寅冬赴明州船場候潮浙江上遇歐
陽三丈叔弼相與遨遊談話旬日甚樂因及三丈所作
康節先生謚議三丈曰異哉吾之斯文也何吾以道愛

之深耶曰丈人斯文可謂合矣何異之有曰姑聽之
斐從母王宣徽夫人得疾洛陽先妣夫人亟以斐入洛時
先公參大政臨行告戒曰洛中有邵堯夫吾獨不識汝
為吾見之斐既至洛自幸得見先生何期賜之從容則
起問其所以宜教者先生笑曰有家法有家法既乃作
而言曰豈無以為足下言者先生乃徐道其立身本末
苦辛精細畢平生於一席端出門揖送猶曰足下其無
忘鄙野之人於異日斐伏念行李間先生豈不少我哉

未嘗辱教一言雖欲不忘亦何事耶歸白大人則喜曰
幸矣邵堯夫有以處吾兒也其後二十年裴偶入太常
為博士次當作先生謚議乃恍然周省先生當時之言
落筆若先生之自序云爾無待其家所上文字也叔弼
丈為人廉於名譽俛俛常有退讓之色其為說之道此
時意氣甚武宜其文之健且高也說之謝曰昔郭景純
先知一作知其行刑者吾康節先生知謚議博士迹則類矣
然郭以術先生則孰知其所以然耶叔弼文曰世稱先

生數學如何說之復言曰先生傳先天之數雖揚雄張衡關子明所不及然亦吾先生易中一事也叔弼丈嘆曰先生之易畢能悉備如是盍為我道之說之辭不敏且不幸不及先生之門而為京氏易十餘年後遇先生門人洛陽楊寶賢略能發先生易之梗槩久之乃有所入則知先生起卦以四是謂夏時以六是謂坤乾以八是謂周易先生使夏商之易不亡而周易乾夬之變始終不窮猶丈人之作謚議也叔弼丈復謝曰吾之文於

是乎陋矣嗟夫歲復一星矣三丈下世已累年追惟故人存者有幾先生之子伯溫又遠守南充以書來趣說之記其事不得而辭云宣和四年四月丙申成州清心堂嵩山晁說之記

贊

喬仲常所畫伏羲神農贊

我有兩儀彼有天地父子以親君臣以位

右伏羲贊

草木昆蟲生彼微塵有待於我為天下仁

右神農贊

先聖贊

商人周人執射執御有意有必有固有我

伯時所畫觀音大士贊

政和癸巳丙寅

六臂二首三目一化佛是則名拙度人天觀巧相

楊朴先生畫贊

東里多才晚有夫子蹇驢逍遙不見畢李

歐陽文忠公畫贊

惟我昭陵公乃得升天下無朋國有魏公公乃得容不
朋以忠風波既散高山獨見小人是嘆昔賢在是寧論
厥似聞其百世

呂獻可畫贊

君子曷貴貴其知微四海乂安公曰優為天下無事庸
人撓之雖古人語由公信斯後十百世公言莫違公像
朝夕以慰我思

東坡先生畫像贊

幼而見公浙江兮知其議論不容於國中也壯而見公
中都兮知其雖合而必不久容也及其南遷泣別隋岍
兮惜乎不克保厥躬也今公遺像忽相逢兮喜公不死
亦復如夢也

又

世五百年生命世才嗟嗟東坡何時復來邦人為我頗
頷以哀我告邦人大實艱哉和氣充塞大象昭回海瀆

澄瀾嶽鎮絕埃斯人是生實易可能世或千億地亦九
垓未必禹服公復徘徊生奉諾言死莫尊壘矧公不死
丹青日開用究邦頌以寫我懷

澗上丈人畫像贊

嵩山

裳芙蓉而飲沆瀣兮胡可衣而食之朋松介石以遊叢
霄之上兮孰敢出而仕之咸以是像識君或曰非兮蓋
惟海雲山月似之

前史官知河中府晁无咎畫像贊

南京

壯年高標今日見兮誰識幼時之奇童默然不可問於
茲兮嗟昔辯翻濤而聲懸鐘凜然端笏若抗議於朝兮
曾不得斯史登金門以獻厥忠爛然文章溢世以振顏
俗兮史筆欲落而屢貶以終窮恪管庫而肅郡國之可
攷兮九州總總不為我功孰為史氏姑以我文苑著兮
猶足高乎華嵩

杜方叔先生畫像

術黃帝岐伯名盛出汶上而入京師一人為之異禮改

觀我則尊所學以慎厥時恥同列之市道而未嘗於近
倖枉一辭以故官則不達室則不富今其有子有孫而
四方之顯者自稱弟子曰吾其早得師建炎二年戊申
八月二十四日海陵旅舍嵩山晁伯以父老法華題

銘

硯銘

歙石風字樣自
云應制舉時物

東坡居士初謫嶺表道扶疎園遺此硯寶公今云亡物
不自足敢是不祇以為諂瀆

刻于
石

瓦硯銘

彼石研乃以瓦名而用適此瓦乃抗乎石硯而特立上
古未有陶人一作之人未陶則石先乎瓦既為研則稱古瓦而
不稱古石

晁伯以銘所藏古端溪風字硯以易張平叔大
圓歛研

劍所施易人訝其存硯豈不然惟人所敷嗟張公子與
德俱溫

古瓦硯銘

十五之童七十之翁難與並儀容兮剖蚌之珠出家之
機未易相發揮兮古人之硯貴採新石何世人之不聞
不識兮王孫李賀比端石以養弘之血則吾之硯氣象
煢煢兮

滕子濟硯銘

小塘之水澄以清大手於焉翻四瀛問誰從爾與世鳴
墨作蓬萊筆蛟鯨

溜石硯銘

硯石溜修通鑑上所賜孰敢借質本良輕漚泛無循名
名多忝

呂申公筆格銘

申公純德見是筆格我日慎之惟今惟昔

筆山銘

頂平岱宗之瞻兮峰聳莖莖之三分翠潤湘水之漸兮
互值朔雲之嚴兮上古之嶽四而不五何所嫌兮嵩高

居士以砧筆墨名數兼兮

老徐牡丹銘

江南無此花而有此筆洛陽賞花賦詩人自得丹青有
色而花本無色誤彼蜂蝶飛來紛紛亦適

題跋

題孫少傅致政小錄

說之見伊川先生論曾子易簣事先生曰是禮也君子
所以貴乎禮者為其以之而生以之而死如此其明也

說之曰是禮古人孰不然蓋曾子獨有傳焉爾後世之士自賤其身而絕其禮此事始廢或者似有得於此而蔽于浮屠老子虛誕之說乃不謂之禮而謂之達安知吾道之所以貴哉先生曰然既而觀溫公所著凶儀之初終篇曰疾病遷正寢內外安靜俟絕氣男子不終於婦人之手春秋書公薨於路寢禮之正也近世孫宣公臨終遷外寢君子慎終不得不爾予於是嘆曰生雖無所能幸而接伊川議論觀溫公所著書知宣公之行事

庶幾乎得正而斃焉然未得宣公之詳也近獲徂徠先生所作孫少傅致政小錄知公自初疾病至遷外寢擇日時治命作遺表安妥不異平日又復嘆曰君子以禮為重死為輕謹吾禮而不知死生之變當如是哉顧其生也肯失道冒義顛倒勢利之塗與豺狼狐鼠輩計較得失錙銖耶苟或嗜欲外驚精神中乾抱疾如被桎梏暝無所知垂首流涎沫環視妻兒戀戀然累晝夜不得死去莫知所出則捐所蓄以媚醫巫佞佛老豈知有人

曰曾子曰宣公也耶輒書於致政小錄之後以自警并
以告吾同志者大觀戊子八月甲申題

跋東坡剛說

東坡甲戌年後詩文說之所見不少矣今日乃始見剛
說於明州令人不覺意氣自倍魯直字畫亦云剛矣而
李端叔者輒有疵評是方竹可削茸氈必待表歟政和
元年辛丑嵩山晁說之謹題

跋張芸叟諫議字題

唐青錢張學士自號浮休子今張芸叟丈亦浮休稱何
耶泗上許體之自名醉吟先生無乃與白公類耶年月
日嵩山晁說之題

跋米元章與趙景升帖

通州防禦使令峻既寔孝恭公之誌銘雪淚而言曰卜
日有期因使刻畫未工播傳且不遠廣二恨沒身將無
以贖乃移諸橫石增筆墨之美而施則無窮君子於是
知孝恭之所以為孝恭者既自躬之復見子之其源流

可勝道哉伏念燕懿王體貌魁偉謹慎寡言好讀書無
犬馬之玩是孝恭之所自耶政和四年甲午六月戊午
嵩山晁說之題

跋趙周翰詩卷

歐陽公為趙公灑掃平山堂時禮貌誠意今猶可想也
文章之名其所以重於天下者抑又有此歟宣和庚子
十二月壬申嵩山晁說之題

儒林舊德知舉時溫公為小試官宜與內翰公之厚如

此也公之子子和實有家法於斯一物見趙氏三世之人物云宣和庚子十二月壬申嵩山晁說之題

題戒殺生文後

說之竊聞國史錢內翰傳稱著殺生戒後吾祖文元公贊之推廣其意史官是以知仁澤之助也然史官不言錢公策試賢良方正時實吾祖文元公為其主司公忘去輩行以獎善其用意尤深切矣或曰史官之書曰文元公後見而贊之益廣其意非歟莫得而詳已慈雲當是

時與三公甚厚宜其德名今猶凜然也宣和五年癸卯
四月戊申晁說之再刻板謹題

題東坡魚枕冠頌

東坡先生為兵部尚書時為說之言黃州時陳慥相戲
曰只不能作佛經曰何以知我不能曰佛經是三昧流
出公未免思慮出耳曰君不知予不出思慮者胡不以
一物試之陳不肯曰公何物不曾作題目今何可相煩
者復強之乃指其首魚枕冠曰頌之曰假君之手為予

書焉可也陳於是筆不及並墨滿且笑曰便作佛經語
耶說之請公書自頌曰不揆輒欲著其作頌始初本末
如此以視後之學者而流落頽墮負其初志三十有三
年矣今年以其頌歸謝甥伋伋聞而有請則不得辭遂
亟識之并以當時所書李潭馬贊歸伋宣和七年乙巳
二月十六日丁巳朝請大夫致仕晁說之題

東里
易堂

跋夏均父萬言書後

或云此書未備乙夜之覽說之不信也吾民因斯言而

厚矣衛叔玉停山公主事鮮有為上及之者偉哉日月
天台教主老法華泊舟睢陽題

題七賢圖

評書曰非鍾則王豈知書者畫之張吳可同日語耶黃
七兄老矣不得不昏繆如此

咸謂此本唐人所摹借以為高歟實仰之也其點睛不
著意而手柔衣寬非唐人脫筆之妙莫之及也靖康元
年十一月二十日阻凍睢陽泊舟題

跋忠懿王草聖

荆南王脩撰作五朝春秋託始於吳越猶之魯也忠懿
王文武之才於是乎亦可少窺矣靖康元年十一月二
十二日箕山晁說之題

題魯直嘗新柑帖

元祐末有蘇黃之稱漸不平之或曰蘇公自有芍藥之
評恐未必然也靖康元年十一月二十二日箕山晁說
之題

題魯直章草顛草

章草似晉人顛草似唐人靖康丙午十一月癸未箕山
晁說之題

題東坡試袁紹先筆借登真隱訣

袁紹先筆余近亦得試之登真隱訣在道藏中公何必
苦求耶靖康元年十一月二十二日晁說之題

題東坡詩

柳子厚詩與陶淵明同流前乎東坡未有發之者檀弓

則又東坡窺之以學為文章者靖康丙午仲冬二十二
日箕山晁說之題

思無邪齋松聲如波清明燈淨几必作數字知公樂哉
何所憂賴公力予之斯言責韓公而怨蘇公也靖康元
年仲冬二十三日箕山晁說之題

題蔡君謨弔石曼卿詩後

蔡公於是乎句法曼卿而字畫曼卿真足以弔矣靖康
元年十一月二十三日嵩山晁說之題於睢陽舟中

題江南後主詞翰

黃魯直謂李後主書出於裴休予初大駭之惟見休石刻字故也晚乃見休行書墨跡一帖良以媿嘆靖康元年丙午十二月二十六日箕山晁說之避地于高郵題
題破琴詩後

予有王晉卿淡碧絹畫房瑣悟前生圖寫此詩於其後
甲午年遭火矣靖康丁未正月十三日晁說之題

跋王安簡公帖

王安簡公與說之曾祖文莊公特相善為書文元公誌
銘實文元公門下客云靖康丁未正月十三日晁說之
題

跋唐劉元方勅

開元中唐元度兄弟作此樣敕字後至本朝未之或改
也蔡司空始別創一體謂之蔡家敕靖康丁未正月十
三日晁說之題

題衛夫人像

此女子南嶽魏夫人歟非也或曰王右軍師衛夫人亦非也不見其道氣秀氣則知然無乃謝家諸女歟靖康丁未正月十三日晁說之旅舍題

題東坡帖

梁武帝不能辨右軍帖真偽必送陶隱居審定

題無水池新硯

若硯不欲受水則墨亦不欲磨硯至於筆不欲點墨紙不欲落筆惟投縣過白紙者即得之也雨暗窻昏旅思

大不佳書以示德全而病目又不能寫字也正月二十
二日天台教僧

題黃龍山僧送善澄上人詩卷

三槐王氏以重望著於世自晉公始善澄上人實晉公
六世孫也初有所感而為僧受具戒遊禪林遠極江湖
之勝得黃龍道場而止焉不敢自放於斯也復北抵河
朔乞衆僧之供於是黃龍大德曰德逢善清如山惠古
宗秀直言紹明重政相與賦詩送行余避賊高郵獲觀

覽欣然益嘆劉夢得善論僧家之詩也因定而得境故
脩然以清由慧而遣辭故粹然以麗今於黃龍諸公見
之矣雖然夢得知其正而未知其助也久矣有正必待
夫有助也釋門諸公挹山川之英而絕塵垢之外其脩
然粹然者豈非學士大夫為之助歟湯休之詩實自於
鮑明遠靈一律師之詩既學潘阮江謝而又得李華朱
放張繼皇甫冉張南史以遊焉皎然禪師實謝靈運之
裔孫其相從則顏魯公韋蘇州孟襄陽李袁州陸長源

皇甫曾陸羽張志和廣宣則韓吏部柳柳州劉白近時
秘演從歐陽公參寥從東坡亦已衆矣黃龍諸公予不
知師友爲誰而江南詩人黃魯直則其人歟言公之字
畫絕類魯直蓋可見也已魯直死已久計今江南必復
有一魯直出澄上人歸山中與諸公亟訪之爲我謝曰
今日賢者不宜以山中爲樂也靖康丁未春晁伯以

跋李太白草書

葛叔忱豪放不羣客爲叔忱嘆李太白無字畫傳於後

叔忱一日偶在僧舍縱筆作字一軸自名之曰李太白書以戲一世之士且與其僧約曰異日無語人每欲其僧信於人也其所謂得之丹徒僧舍者乃書之丹徒僧舍也柰何不信者請以三事質之昔人有一書曰古今能書人姓名自謂悉盡矣恨不得聞見而錄之也乃獨於白而遺之耶以故法書要錄法書苑墨藪諸家皆無白書之品第也白自負王霸之略飲酒鼓琴論兵擊劍鍊丹燒金乘雲仙去其志之所存者靡不振發之而草

書奇屈如此寧謙退自晦無一字乎白集有懷素草書
歌識者曰非白所作也真偽未敢論要之白無一語自
及其書何耶會稽湖上記者賀監與斯人清狂捐落萬
事顧肯孜孜收拾白藁草以欣戚耶靖康下未避地高
郵任城二十二叔父命書

書與郭壽

高郵郭四叔名壽本名永壽遇師得術治瘡瘍癰疽手
出而愈不以醫自名也常恨賤無以及物幸此術以施

所願焉特有所甚難者不惜高價畜四方之真藥故其
用藥與人同而功倍於人未嘗受人一錢以佐所費也
僕去年冬自睢陽避金人至高郵夏五月悲傷鬱塞中
疽發於背賴叔脫死而生與叔語蓋類五戒道人有得
於中而忘於外者與僕將何以謝之而叔知之知所貴
莫如文辭欲吾之言以為好於是乎書

二硯說

表弟盛元緒朝議有歛石硯二憐余脫身兵火之中欲

以見歸其一大質而小文製作直而樸見者醜其質而不知其有文也其一象鼎之形而衆以鑿目之夫鼎鑿之相去豈不遠哉奈何辱之以名耶或辱以名或醜其質則二者曷留余於是摩挲而嘆曰老矣不徇世之名不欲吾之實無物而不可處也吾弟方慎名而謹實俱思去焉可也

題劉器之與陳止之書

劉六器之文忘年下士其字畫出於宣獻公皆與時異

尚云建炎二年戊申三月二日晁說之題

慎終追遠見於若人矣今誰復為此公興嘆哉建炎二年戊申三月二日晁說之題

題宋宣獻帖

常山公有書名一時蔡君不能揜也茲二帖益重吾兩家事契哉建炎戊申上巳海陵旅舍晁說之題

題陸子履帖

陸子履少有書名而晚年名似減何也惟歐陽公始終

眷眷於斯人耳建炎戊申上巳擁火海陵旅舍中晁說之題

跋元咎兄所作李季良字叙

說之獲觀季良父詩後數日觀此序重增歎息建炎二年戊申三月九日海陵旅次

題石曼卿送周卿遊邊

觀曼卿書想見其談兵雖范文正公不能折也要在尹師魯頽挫耳清明後一日箕山晁說之題

跋沈睿達寫桃園圖

治平熙寧間睿達書名自浙江振京師誰知有東坡書
哉況又十五餘年後稱黃魯直書至於內人裙帶事識
者猶為睿達嘆息之建炎戊申清明後一日箕山晁伯
以父

題李公擇尚書宣諭

卿博通史學入侍金華多所發明深副虛寧祖宗時講
筵尚耆艾相與尊先儒不過明訓詁有聽而無難不足

於言而有餘於行進退容止肅如也當守望之寧待其
言之華哉近時務以英俊為講席之寵悉反舊制如元
祐中李尚書之口宣當上之史官建炎二年三月壬寅
海陵旅次晁說之題

題張泰然清白堂記

唐陳子昂呂溫皆自銘其世德云取法於古人而世人
無知吾家之所積者泰然於清白記何嫌建炎戊申四
月癸亥嵩山晁說之題海陵旅次

題僧希白摹法帖

僧希白書豪放自得恨平生功淺乃手摹內法帖而不能沒其俊氣東坡故不喜王著之拘而喜白之逸戊申七月二十七日海陵旅舍晁伯以父

題晉上人智果帖

建炎二年戊申七月二十七日天台教僧老法華海陵旅次題

鍾王筆法隋人所得與唐人不同大抵隋多鍾而唐多

王耳果師當在永素之間視懷仁輩如何老法華再題
余得此書三日不病餘尚何言哉闕旦日旅次西齋

題周景夏所藏東坡帖二

余嘗謂古人因書而得名後人因名而名其書李德素
一時高士也善能評魯直書云建炎二年戊申七月三
十日嵩山晁說之海陵旅舍

蔡君謨死後宋次道陸子履獨擅書名既而沈睿達書
得名甚峻於時未有一人稱東坡書者公方日奏忠言

犯時禁忌其名自有所在而未暇以書稱也逮公書名出而太雅君子傷之建炎二年戊申七月三十日嵩山晁說之海陵旅舍題

題跋趙清獻帖與故人周尉之六秀才帖

清獻公之帖豈獨為周氏之榮於時邦家朋友故舊風俗之美公之力顧勿多邪建炎戊申八月一日嵩山晁說之海陵旅舍題

題趙清獻與周彭澤詩

此詩其傳則清獻公所作彭澤君之誌非畧也建炎二
年戊申八月一日海陵旅次嵩山晁說之題

題蕭詢筆

海陵蕭詢少年能識毫作筆輒嘆曰小藝自有微妙處
我自不能到其處耳世豈無其人哉乃遊宣州見諸葛
言潤州見陶穎常州見許遇而蘇州仲璋俞俊杭州李
正方秀州沈明和州柳載皆身事其人心其法以諸家
之善一日歸鄉中旁郡邑舊有名者往往忌之而不敢

疾也詢既有以動其本色人則彼食鱠者

闕

景迺生集卷十八

謹案卷十七第四頁後六行不二德原本缺此三

字據下文補

第十二頁前五行伺察外事原本外上行內字據

宋史富弼傳刪

第三十頁後七行煖於許家父原本脫父字今增
卷十八第一頁前七行得古簡編科斗文字原本
脫斗字據經義考所引本篇增

第一頁前八行別有陰陽說原本脫別字據經義

考所引本篇增

第二頁前三行散太玄贊與測於八十一首之下

原本脫之下二字據經義考所引本篇增

第四頁後五行而陰陽之肆者謂之飛原本脫此

九字據京房易傳及經義考所引本篇增

欽定四庫全書

總校官庶吉士臣侍朝

校對官中書臣王鍾泰

膳錄監生臣熊瀛

欽定四庫全書薈要

集部

景造生集卷十九

詳校官助教臣謝登雋



欽定四庫全書薈要卷一萬五千三百五十六


集部

景迈生集卷十九

宋 晁以道 撰

傳

揚雄別傳上

揚雄字子雲蜀郡成都人也周幽王封宣王子尚父于

揚號曰揚侯其後并于晉河東揚侯子孫遂以揚為氏
雄本晉之揚自其五世祖季徙諸蜀雄少而簡易清淨
好古學從同郡嚴君平遊顧好尚辭賦宗司馬相如嘗

嘆曰長卿賦不從人間來其神化所至耶初相如與枚
乘孽子臯臯文思敏疾相如頗淹遲有以二人問者
雄曰軍旅之際戎馬之間飛書馳檄用枚臯廊廟之下
朝廷之中高文典冊用相如然帝于辭賦自俊捷亦苦
相如之艱嘗謂相如曰以吾之速易子之遲可乎相如
曰於臣則可未知陛下何如耳蓋相如亦自謂有所短
而雄之論乃如此雄嘗作縣邸銘王侁頌階闥銘成都
城四隅銘蜀人有楊莊者為郎頌之于成帝成帝好之

以為似相如雄遂以此得見待詔承明之庭時永始四年也雄年四十矣帝方以正月郊祠甘泉詔雄賦甚遽雄倉猝應詔其賦極瓌瑋盡諷諫之義及三月帝帥羣臣橫大河湊汾陰以祀后土雄又作河東賦以帝好廣宮室又作甘泉賦以諷戒帝多玩書善雄賦頌出入遊獵雄必從十二月帝縱胡人羽獵雄因作羽獵賦雄既待詔歲餘給事黃門為郎後一歲帝又命雄作綉補靈節龍骨之銘詩三章帝得之喜甚當時之語曰玩子雲

之篇章樂於居千石之官西羌嘗有警帝思將帥之臣
追美趙充國詔雄即未央宮充國圖畫為頌綏和元年
秋帝大誇胡人多禽獸復幸長楊縱胡客大校獵雄復
作長楊賦上之比以諷帝雄為郎時自奏少不得學而
好沈博絕麗之文願不受三歲之奉且休脫直事庶得
肆心廣意以自克就有詔可不奪奉令尚書賜筆墨錢
六萬得觀書于石渠時京師班嗣者右曹中郎將孺之
子顯名當世孺嘗賜秘書之副而嗣為人好賢從雄遊

雄由是內外之書無不觀矣然非聖不好也時人稱雄
曰西道孔子有張子侍者問沛郡桓譚曰子雲亦東道
孔子也昔仲尼豈獨為魯孔子而不能為齊楚聖人也
王公子亦問子雲于譚譚曰漢興以來未有斯人雄雖
甚貧而輕財惡利無所事于世作逐貧賦以自見曰楊
子遁世離俗獨處左隣崇山右接曠野隣垣乞兒終貧
且窶禮薄義弊相與羣聚惆悵失志呼貧與語汝在六
極投棄荒遐好為庸卒刑戮是加匪惟幼穉嬉戲土沙

居非近隣接屋連家恩輕毛羽義薄輕羅進不由德退
不受呵欠為滯客其意謂何人皆文繡余褐不完人皆
稻粱我獨藜藿貧無寶玩何以接歡宗室之晏為樂不
樂徒行負債出處易衣身服百役手足胼胝或耘或耔
霑體露肌朋友道絕進官凌遲厥咎安在職汝之為舍
汝遠竄崑崙之顛爾復我隨翰飛戾天舍爾登山岩穴
隱藏爾復我隨陟彼高岡舍爾入海汎彼柏舟爾復我
隨載沉載浮我行爾動我靜爾休豈無他人從我何求

今汝去矣勿復久留貧曰唯唯主人見逐多言益嗤心
有所懷願得盡辭昔我乃祖宣其明德克佐帝堯誓為
典則茅茨不剪匪凋匪飾爰及季世縱其昏惑饕餮之
羣貪富苟得鄙我先人乃傲乃驕瑤臺瓊室華屋崇高
汴酒為池積肉為嶠是用鵠逝不踐其朝三省吾身謂
予無咎處君之家福祿如山忘我大德思我小怨堪寒
能暑少而習焉寒暑不忒等壽神仙桀跖不顧貪類不
千人皆重蔽子獨露居人皆怵惕子獨無虞言辭既罄

色厲目張攝齊而興降階下堂誓將去汝適彼首陽孤
竹之子與我連行余乃避席辭謝不直請不貳過聞義
則服長與汝居終無厭極貧遂不去與我遊息哀帝時
丁傳董賢用事人皆媚之以貴富雄獨安于郎署而大
韋思渾天或者信蓋天之學詆渾天雄乃發八難難蓋
天以通渾天云日東行循黃道晝中規牽牛距北極北
百一十度東井距北極南七十度并百八十度周三徑
一二十八宿周天當五百四十度今三百六十度何也

春秋分之日正出在卯入在酉而晝漏五十刻即天蓋
轉夜當倍晝今夜亦五十刻何日入而星見日出而星
不見即斗下見日六月不見日六月北斗亦當見六月
不見六月今夜常行何也以蓋圖視天河處斗而東入
狼狐間曲如輪今視天河直如繩何也周天二十八宿
以蓋圖視天星見者當少不見者當多今見不見等何
出入無冬夏而兩宿十四星常見不以日長短故見有
多少何也天至高地至卑日託天而旋可謂至高縱人

目可奪水與景不可奪今從高上山以水望日日出水
下影上行何也視物近則大遠則小今日與北斗近我
而小遠我而大何也視蓋轆與車輻間近杠轂密益遠
益疎今北斗為天杠轂二十八宿為天轆輻以星度

闕

天南方次地星間當數倍今

闕

密何也時獨桓譚信雄

學雄與譚嘗同奏事待報坐西廊廡下以寒暴背雄語
譚曰蓋天以天如推磨石轉而日西行者其光景當照
此廊下稍而東耳不當拔出去拔出去是應渾天法渾

為天之真形於是可知雄按渾天著書曰大玄曰玄也
者兼天地人之道而天名之或曰述而不作玄何以作
雄曰其事則述而書則作或曰玄何為雄曰為仁義或
曰孰不為仁孰不為義雄曰勿雜而已矣雄於玄用思
甚苦嘗夢吐白鳳集玄上久之而滅或曰無為自苦故
難傳當時儒士劉歆張竦輩雖與雄善獨于玄弗好也
雄知時人所好在彼不在此乃作太玄賦曰觀大易之
損益兮覽老子之倚伏省憂喜之共門兮察吉凶之同

域皦皦著乎日月兮何聖人之暗燭豈惕寵以冒災兮
將噬臍之不及若飄風不終朝兮驟雨不終日雷隆隆
而輒息兮火猶熾而速滅且夫物有盛衰兮況人事之
所極奚貪婪于富貴兮迄喪躬而危族豐盈禍所棲兮
名譽怨所集薰以芳而致燒兮膏合肥而見炳翠羽
嫩而缺身兮蚌含珠而擘裂聖作典以濟時兮驅蒸民
而入甲張仁義以為網兮懷忠貞以矯俗指尊選以誘
世兮疾身沒而名滅豈若師由聃兮執玄靜于中谷納

僞祿于江淮兮揖松喬于華岳升崑崙以散髮兮踞弱
水以濯足朝發軔于流沙兮夕翱翔乎碣石忽萬里而
一頓兮過列仙以託宿役青要與承戈兮舞馮夷以作
樂聽素女之清聲兮觀宓妃之妙曲茹芝英以禦饑兮
飲玉醴以解渴排閭闔以窺天庭兮騎騂騄以踟躕載
羨門與儷遊兮永周覽于八極亂曰甘餌含毒難數嘗
兮麟而可羈近犬羊兮鸞鳳高翔戾青雲兮不卦罔羅
固足珍兮斯錯位極離大戮兮屈子慕清羹魚腹兮伯

姬曜名焚厥身兮孤竹二子餓首山兮斷蹟屬婁何足

稱兮譬斯數子智若淵兮我異于是執太玄兮蕩然肆

志不拘攣兮獨鉅鹿侯芭受玄于雄為玄章句桓譚亦

好之然不若好雄賦之甚也譚嘗問雄曰何以能賦雄

曰能讀千賦則善初雄因成帝嗜酒作酒箴以諷帝曰

觀瓶之居居井之湄處高臨深動常近危酒醪不入口

臧水滿懷不得左右牽于纆微一旦惠礙為寃所輻身

提黃泉骨肉為泥自用如此不如鴟夷鴟夷滑稽腹如

大壺盡日盛酒人復借酤常為國器託于屬車出入兩
宮經營公家由是言之酒何過乎時杜陵陳遵放縱于
酒見雄賦大喜謂所友張竦曰吾與爾猶是矣故其因
人問賦可以諷乎雄曰諷則已諷而不已吾恐不免于
勸也又有問雄少而好賦者雄曰童子雕蟲篆刻壯夫
不為也蓋其晚年立言明教絕意于賦不復為矣因時
人問答著法言十三篇明帝王之道而廣大幽微備矣
建平四年單于上書願朝五年哀帝時被疾或言匈奴

從上流來厭人自黃龍竟寧時單于朝中國輒有大故
上由是難之以問公卿諸公卿亦以為虛費府帑可勿
許單于使辭去未發雄上書諫帝以為六經之治貴于
未亂兵家之勝貴于未戰二者皆微然而大事之本不
可不察也今單于歸義懷款誠之心欲離其庭陳見于
前此乃上世之遺策神靈之所想望國家雖費不得已
者也奈何距以來厭之辭疏以無日之期消往昔之恩
開將來之隙夫百年勞之一日失之費十而愛一臣竊

為國家不安也唯陛下少留意于未亂未戰以遏邊萌
之禍書奏天子感悟召還匈奴使者更報書而許之賜
雄帛五十疋黃金十斤雄視朝廷綱紀紊亂知言之
不行而不言然獨見機會之決弗得弗言也元始中徵天
下通小學者以百數各令說字于庭中雄取其有用者作
訓纂篇以續倉頡又易倉頡字之重複者凡八十九章雄善
書在西京時以書稱者蓋寡前有司馬相如張敞嚴延
年後則史游孔光劉向雄及陳遵雄久為郎校書麟閣

見天下上計孝廉及內郡衛卒會者常把三寸弱翰齎
油素四尺以問異語歸即以鈇摘次于槩積二十有七
歲而書成名曰輜軒使者絕代語釋別國方言方言者
蓋爾雅之流也時茂陵郭威好讀書以謂爾雅周公所
制而有張仲孝友等語疑之以問雄雄日記言孔子教
魯哀公學爾雅爾雅之來遠矣自古學者皆云周公作
當有所據其後孔子弟子游夏之儔又有所記以解釋
六藝故有張仲孝友等語

揚雄別傳下

劉歆聞雄作方言移書雄曰詔問三代周秦軒車道人
使者八月巡路宋代語僮謠歌戲欲得其最目因欲事郝
隆宋之篇中但有其目無見文者歆先君數為孝成皇
帝言當使諸儒共集訓詁會成帝未以為意先君又不
能獨集至于歆身修軌不暇何惶更創屬聞子雲獨採
集先代絕言異國殊詞以為十五卷其所解畧多矣而
不知其目非子雲澹雅之才沉鬱之思不能經年銳精以

成書良為勤矣歆雖不遘過庭亦克識先君雅訓三代
之書蘊藏于家直不計耳今聞此甚為子雲嘉之已今
聖朝留心典誥發精于殊語欲驗考四方之事不勞戎
馬高車之使坐知謠俗適子雲攘意之秋也不以是時
發倉廩以振贍殊無為明上以忠信明于上下以置恩
于罷朽所謂知蓄積善布施也蓋蕭何造律張蒼推歷
皆成之于帷幕貢之于王門功列于漢室名流乎無窮
誠以隆秋之時收藏不殆饑春之際散之不疑故至於

此也今謹使密人奉手書願頗與其最目得使入錄令
聖朝留明之典雄報歆曰敕以殊言十五卷君何由知
之謹歸誠底裡不敢違信雄少不師章句亦於五經之
訓所不鮮嘗聞先代輜軒之使奏籍之書皆藏于周秦
之室及其破也遺棄無見之者獨蜀人有嚴君平臨邛
林閭翁孺者深好訓詁猶見輜軒之使所奉言翁孺與
雄外家牽連之親又君平過誤有以私遇少而與雄也
君平財有千言耳翁孺畧有梗槩翁孺往數歲死婦蜀

郡掌氏子無子而去而雄始能草文復論思詳切集之
張伯松不好雄賦頌之文然亦奇之常為雄言其父及
其先君喜典訓雄以篇目頻示之伯松曰是懸諸日月
不刊之書也又言雄為太玄經由鼠坻之與牛場也如
其用則寔五稼飽邦民否則為坻糞棄之于道矣伯松
與雄獨何德慧而君與雄獨何譖隙而當匿乎哉其不勞
戎馬高車令人君坐幃幕之中知絕遐異俗之語典流
于昆嗣言列于漢籍誠雄心至精之所想構也死之日

則今之榮也不敢有貳不容有愛雄少而不以行立于鄉里長而不以功顯于縣官著訓于帝籍但言詞博覽翰墨為事試崇而就之不可以怠即君必欲脅之以威陵之以武此又未定未可以見今君又終之則縊死以從命也而可寬假延期必不敢有愛唯執事者圖之長監于規綉之就死以為小雄敢行之時歆為王莽國師威權可畏而雄之辭如此蓋明其心不與歆也然當其時士皆言符命勸莽代漢唯恐其晚前後封侯者百數

其不附麗者莽輒殺之雄為朝廷聞人既不言符命然不可以默逮莽既僭乃奏劇秦美新一篇劇秦之慘酷而美諸新待新猶秦耳甚莽方自聖而弗寤也先是建國五年元后崩莽詔雄作誄有曰漢廟黜廢移定安公皇皇靈祖惟若孔臧其言亦無阿倚特以耆老久次為中散大夫雄見莽更易百官變置郡縣制度大亂士皆忘去節義以從諛取利乃作司空尚書光祿勳衛尉廷尉太僕大司農大鴻臚將作大匠博士城門校尉上林苑

令等箴及荆揚兗豫徐青幽冀并雍益交十二州箴皆
勸人臣執忠守節可為萬世戒先是雄在蜀時嘗著蜀
王本記蜀都賦以極其山川地里人物之實又嘗錄宣
帝以至哀平紀傳皆備其後班固因之嚴遵君平高蹈
之士也雄仕京師顯名數為朝廷在位賢者稱君平德
杜陵李辟疆素善雄久之為益州牧喜謂雄曰吾真得
嚴君平為吏矣雄曰君備禮以待之彼人可見而不可
得誶也辟疆心以為不然及至蜀致禮與君平相見欲

屈以為從事卒不敢言乃嘆曰揚子雲誠知人可謂哲
矣雄同郡里中田儀與雄幼稚交後雄舉之于朝久為
五官郎中以私得罪時舉儀者皆懷赧低眉以自恐恨
劉歆亦為雄云云雄曰儀舉至日雄之任也知人之德
堯舜猶病雄何慚焉議者終多雄之知君平而不以田
儀累之也孔子元者孔子十七世孫也為郎校書七年
官不益或譏以不恤進取獨雄與善山陰陳囂有義行
名未振雄上書薦之於是聲名粲然傳世矣仕至太中

大夫潞水伶玄好學知音律善屬文然無所矜式雄獨
知其才而病其學之不適正而知之而弗好也蓋雄之
好惡不苟如此及于法言稱谷口鄭樸子真蜀人李弘仲元
與嚴君平蜀人聞之有賁錢千萬願載名于法言者雄謝之
雖林翁孺猶不得與也甘露元年戊寅鷄鳴雄生天鳳
五年四月乙丑晡卒葬安陵阪上侯芭桓譚共為治喪
朝臣郎吏及諸公遣世子來會送甚盛譚為斂賻起祠
置塋芭負土作墳號曰玄塚與譚守墳如子禮雄有子

曰童烏九歲與玄文先雄卒雄比歲亡二男竭力歸葬
于蜀雄由是益貧及雄卒不能歸葬而妻子乃還自長
安

嵩山晁說之曰揚子傳孔子之道立言明教宜其行事
甚大昭著無遺而有不見于本傳者得之于諸子書傳
記因次第之為別傳焉有與本傳異同甚者疏之雄為
郎不願受奉以視無仕進心幼子卒而必經紀反葬于
蜀以視不終長安故守一官而閱三世不遷觀其人豈

詣行在獻賦者而本傳言奏甘泉等賦蜀人楊莊誦雄
文于成帝帝因徵雄待詔而肯為王音門下吏耶至於
投閣事余亦疑焉而世已有辨之者

李挺之傳

李之才字挺之青社人天聖八年同進士出身為人朴
且率自信無少矯厲師河南穆伯長伯長性卞嚴寡合
雖挺之亦頻在訶怒中挺之事先先生益謹嘗與叅校柳
文者累月卒能受易時蘇子美亦從伯長學易其專授

受者惟挺之伯長之易受之种徵君明逸种徵君受之
希夷先生陳圖南其源流為最遠究觀三才象數變通
非若晚出尚辭以自名者挺之初為衛州獲嘉縣主簿
權共城令所謂康節先生邵堯夫者時居母憂于蘓門
山百源之上布裘菜食且躬爨以養其父挺之叩門上
謁勞苦之曰好學篤志果何以康節曰簡策迹外未有
迹也挺之曰君非迹簡策者其如物理之學何他日則
又曰物理之學學矣不有性命之學乎康節謹再拜悉

受業於書則先示之以陸淳春秋意欲以春秋表儀五經既可語五經大旨則授易而終焉世所謂康節先生之易者寔受之挺之挺之器大難乎識者棲遲久不調或惜之則曰宜少貶以圖榮進友人石曼卿獨曰時不足以容君君盍不棄之隱去再調孟州司法叅軍時范忠獻公守孟亦莫之知也忠獻初建節鉞帥延安送者不用故事出境外挺之獨別近郊或病之謝曰故事居頃之忠獻謫安陸挺之泂檄見之洛陽前日遠境之客無一

人來者忠獻于是乎恨知挺之之晚友人尹師魯以書
荐挺之于葉舍人道卿因石曼卿致之曰孟州司法叅
軍李之才年三十九能為古文章語直意遠不肆不窘
固足以蹈及前輩非洙所敢品目而安于卑位頗無仕
進意人罕能知之其才又達世務使少用于世必過人
甚幸其貧無貲不能決其歸心知之者當成之曼卿報
師魯曰今之業文好古之士至鮮且不張苟遺若人其
學益衰矣是師魯當盡心以成之者也延年素不喜屈

謁貴仕以挺之書凡四五至道卿之門通焉而後已道卿且樂荐之以是不悔挺之遂得應銓新格有保任五人改大理寺丞為緱氏令未行會曼卿與龍圖閣直吳學士遵路調兵河東辟挺之澤州簽署判官于是澤人劉仲更從挺之受歷法世稱劉仲更之歷遠出古今上有揚雄張衡之所未喻者寔受之挺之在澤轉殿中丞丁母憂甫除喪暴卒于懷州守舍時友人尹子漸守懷也實慶歷五年二月子漸哭挺之過哀感疾不踰月亦

卒挺之葵青社後十有二年一子以疾卒又二十有四
年有姪君翁乞康節表其墓曰求於天下得聞道之君
子李公以師焉

嵩隱晁說之曰士生而不能以其所學及乎世死又不
得以名覺乎後之人豈大雅君子之志哉李先生者師
事穆伯長友石曼卿尹子漸師魯其為弟子者曰邵康
節劉仲更側聞史氏為六人者立傳獨不及李先生何
耶輒論次以待他日史官採擇

河南邵伯溫曰李挺之康節先生之師也昔嘗聞之先
公曰挺之與尹子漸貌相類又相友善挺之死子漸
官舍子漸哭之慟遂得疾以卒嗚呼二人者乃所謂朋
友歟

墓表

嵩隱長子墓表

嵩山晁說之長子公壽字平子大觀元年丁亥疾病中
改名公艾生于昭德故廬時元豐八年乙丑少敦龐有

成人之氣象方年十三四寺庭游行多得古書畫以歸
嘗欣然視予曰是北齊楊子華勘書圖中一幅也博古
者驗之猶信雖幼善用硬黃影榻古法書予因見澗上
陳叔易寫科斗古文頗留心願學顧非宜教童子者則
乃輒自能為文外作五字詩往往有合處時學李賀歌
行亦不凡端讀禮記嚴于陸氏音其義說制度根柢鄭
氏孔氏不苟異妄從蓋其志不規于舉子事業也間則
泛觀務博庶幾可與學士大夫語言予知其所能者如

是而止也逮其既卒余親為料理其書篋見其簡牘之
志甚大有數巨編正書細密是謂資治通鑑鈔蓋其中
夜燈下之功予悲怛於是增甚久不能忘也其卒在陝
州芮城年二十有三丁亥六月丁巳也是年之春暴得
嗽疾恐貽父母憂強忍不以言既不能離枕席父母始
往問所苦必曰今日少損亦未嘗不巾櫛也一日私語
其妻子曰我死矣謂父母何至死不復他言方其未病
時予偶與論近世人物白首而不遭者或咎諸人彼天

不得壽者又將誰責如吾家微之光道渙之繪道王文
正家慥予顧原武小邢廬山劉和仲皆奇才也吾兒輒
愀然不懌曰是數人者何恨往往見稱于東坡諸公余
當時不知其語不祥也今復忍追恨哉母盛氏自芮城
歸其柩于東里祖塋政和四年甲午四月乙卯葬于祖
塋東第二域之甲穴妻賈氏女三歲曰鍊師男方生六
月名子健

邢惇夫墓表

邢惇夫名居寔生數歲以奇童稱逮年十四五讀書已甚博其年十六七文章各擅體制十八九則論議凜然自成一家法至年二十而病不起矣國中之士識與不識無不嗟惜痛恨有為其父尚書公相持而哭於數年之後者惇夫身幹如尋常男子而廣顙大口眸子炯然精神虹舒霞舉也韓少師見其童兒時異之許妻以孫女元豐中孫莘老李公擇方宦于京師惇夫游二公之門二公待之常若不足一日侍孫公談春秋是孫公之

所名家者引類及南史人物又入於北史惇夫種節調理無少前却疑似之語是時孫公鬚鬢皓白為秘書少監與惇夫相對若翁孫然既而黃魯直自吉州太和縣移德州德平鎮過京魯直有書稱晁以道論士三人其書今行於世所謂三人則惇夫陳無已江子和是已元祐之初海內流落望實之士中都畢集惇夫因得翱翔自振其材辯而師友日盛悉為惇夫忘年也一時政事更張士大夫進退惇夫為之喜怒激昂有出於老成人

憂思之外者每嘆曰當茲日也安得司馬公常存呂公
無恙後來者其謂誰耶惇夫雖年少而知國家尚少則
難處乎前而貴老則難繼其後云惇夫大抵於人不苟
隨必援古昔極源流而公是非雖於其大人則亦唯義
之從惇夫卒於元祐二年二月八日尚書公謫隨州時
尚書公親問其所欲於垂絕之際無他唯曰乞黃魯直
狀兒平昔以累孫莘老銘之有不肖之文存焉則晁無
咎宜為序其後余兄無咎題惇夫南征賦曰昔杜牧不

敢序李賀矧惇夫年未二十文章追配古人充其志非
肯為賀者雖然豈敢負其將死之託耶魯直題之曰嘗
序江夏謝景回師復遺藁云方行萬里出門而車軸折
可為竇涕邢惇夫詩賦筆墨山立甚似吾師復也東坡
題曰江南李泰伯自述其文曰天將壽我與所為固未
足也不然亦足以藉手見古人矣惇夫亦云吾兄暨孫
黃俱不果成惇夫之所志惇夫二弟僚儔乃欲以文表
于墓則歸之嵩山晁說之又已累年說之追念平昔與

惇夫議論千百今不記一二徒可想像於心目間而書
牘唱和詩亦無復少有存焉者蓋自飄流二十年之久
也如復因循不如其二弟之所請則他日使惇夫之所
傳彌不著者余之罪也以余之文淺弱使攬之者重有
恨於前日三公則予於惇夫亦未為無助也余嘗謂趙括
少談兵而父奢不能難者非不能難也不欲怒之也劉
歆之異同其父向者非為斯文也漢廷與新室不可並
處也如惇夫於尚書公則於斯文而不能難者也是魯

參之事點也非曾元之事參也移此其忠顧惟古之大
臣哉嗟夫古人之不壽者余得二人焉王子晉年十有
五識聖賢治亂之源而極天人生死之符顏淵年二十
有九頽然陋巷之中有為邦之志夫子告之以四代之
禮樂所謂具體而微者果知顏子哉其次則又二人楊
雄之子九歲而存則玄當著明無待於侯芭魏武之子
蒼舒十三歲而存則漢之存亡雖未可知必不至於殺
荀文若輩矣則博夫之壽夭所繫可勝言耶東坡貶英

州道符離予見之語及惇夫曰自是國家失一文士於
邢氏何有韓女先亡惇遂未及娶惇夫有文集若干卷
名曰呻吟集墓在大驄山前祖塋之旁母趙氏宣和四
年壬寅七月戊午朝請大夫知成州軍事晁說之撰

宋故平恩府君晁公墓表

晁氏東眷舒州郎中元配公孫氏第三子其字次膺生
而俊氣干雲霄直上與先生長者語無難事也識與不
識見之曰是諸公卿之選已學辭賦於諸兄間日一再

作而立就京師秋賦而時方以理財為新政主文劉貢
父李公擇王忠賦皆與丞相論不同試節以制度不傷
財賦公選甚高禮部不奏名既而廢詩賦用新經義公
曰人各有才智而喜異也是不待一再作者主王氏詩
猶雜以毛公詩登熙寧六年進士科注單州城武縣主
簿時初遣察訪使出按郡國不法遠邇震恐其使京東
者少年新進未更仕任特恃其兄參知政事與丞相方
睦劾一路有幾人可免不坐是人方仰公氣象而不得

不聽其言於是京東有寬政莫知其自公出而人被賜
矣以瀛州防禦推官知洺州平恩縣縣濱河公與衆樂
遊而獨色憂曰何不決今年則明年乃舒以調度民知
無征而不知其有儲也後有小吳之役一道遠邇病矣
而平恩之民因以嘆公神明之政德之今不忘也代還
格礙不得改官以泰寧軍節度推官知大名府莘縣事
民相慶曰平恩之父母也肯獨不以吾屬為莘人之子
乎公於莘得上下之欣喜而譽益遠在平恩時上位居

官如故而待公猶故舊朋友也置不舉屬吏禮數而轉運使李楚老猶不平陰以怒提舉保甲秋諮按刺公以保甲法時保甲法密秋荼也孰非保甲法之罪人哉前日以公為才而肅給異功狀者為今私不奉法而於時政有向背矣獄具除仕籍居楚州大赦居兗州漸以還濟州公裕然不以欣戚於去來曰舌不在不得自致其身也耶公初於濟貧甚何心於吾富哉人術甚疎而殆天有以富之也乃知天命佑之而行者君子也公於是

居閑將十年猶一日也視一世之進退窮達須臾歌笑
感感塗上多平生故人曰孰能為我往謝之嗟夫公能
貧而富窮以達使用其才於朝宜何如哉元祐初有理
訴所公亦未忍自棄於茲時也彼在位者乃不得特恩
洗滌公必欲以散官論如常法公去弗顧曰知命乃為
君子邪議者謂元豐多失士而元祐之失士亦不少也
其在公時不仁者顧豈不有一哉一林之木異質先伐
之材風雨既先摧之孰肯出力以培之此君子之困幽

谷所以不覲三年也或終身幽谷而與株木處矣雖然
使公之官於朝也亦幾何時留哉識者謂使朝廷之棄
公不若公初自郡國棄之也聞者悲之公開居何以發
揮其伊鬱侘傺之感者自念離騷之變國風宋玉景差
之徒殆不知有國風者非忘之也其後以宮商為樂府
者又自一離騷也以故公於是辭有律呂矣其傳寢遠
上達於六宮會新作大晟府起黃鍾於上躬之中指棄
塞古今諸儒異同之論坐取三代以來鍾鼎磬鐃鐃

之屬毀而碎之視不復用昭陵留心躬以封緘之品度
亦不可存矣師臣末為此媚上之術鼓舞天下要得天
下咸知其不可起而仕者必為我出也公乃被迅召入
大晟府奉旨作為一時瑞物之辭乃還公承事郎大晟
府按協聲律咸曰徹乎其衆望也蓋公於語言酬酢之
初失師臣之微矣是行也不知公者謂公喜矣知公者
為公耻之嗚呼前謂公仕於朝而達也亦能久而待其
才之輸乎彼李固杜喬輩於漢祚三絕人君殘昏失道

之時能為其次而不能為其上五王出周后反唐帝斂天下之情而闕日身之敏矣然能勇決於臨事而遲疑於來事二者相望於千歲而不保其躬卒貽後世紛紜之大患則一也公有以當斯任也必見功烈之出非常而不終日矣其他脂韋之厚薄尚敢為公陳哉有以樂府辭為公稱者重可悲乎公政和七年七月二十三日以疾卒于昭德外第實至京之踰月也娶梁氏男三人益之觀之同之女三人壻曰滕伯奇翟光弼馬承休以

其年九月十九日葬魚山世墓之次後十有三年說之
避地海陵乃得論次表公之墓如上建炎二年戊申九
月甲申從姪具官說之撰

宋任城晁公墓表

公諱仲詢字芻民本澶州清豐之晁至公七遷而為任
城之晁曾祖諱佺贈太師中書令祖諱邁贈開府儀同
三司吏部尚書考諱宗愿真州軍事推官母黃氏以年
特恩封壽光縣太君公生而異羣兒出言甚大自謂必

能有成者年十有五從其兄丞吉州太和時黃魯直知
縣事一見公竒之其初見暨別皆有詩而唱和於其中
間者則多矣有云歎君豪甚倚天劍又云見君有家風
懷抱如冰清特其存而不泯者云耳今其字芻民者魯
直序而命之也越明年去親側遊太學羣四方之士試
而為第二人其居太學者十年單棲猶遠方後門寒士
而未嘗妄出為人一飯留也固無久太學諸生好遊之
常態其初欲為太學之行也於故人所贈金不得辭則

席其床下而去凡五試禮部不奏名退歸任城事親而
樂焉嗟乎任城可居而公無銖兩以居之也公自為言
曰士之孝則吾豈敢若因天地之道則謹吾之身而節
時之用以修吾親之甘旨者庶人之孝也吾何敢不勉
由是公有富之名而燕四方賓客不間於三日也勤施
遠近之遊子必顧彼之意而不顧室中有無也禮文儀
物行於宗族者隨歲時寒暑酒炙行焉率以為親庭之
樂也故時大家之風亦於是乎可見矣人益以富稱公

而公富之逮公貸錢以奉壽光之葬并舉族人之旅殯
十數於是人始嘆公之德宇難窺也蓋公風儀凝重不
妄言笑一喜怒猶儼若也大抵非累世積善之家不生
絕俗積德之子恭惟中令生唐末天祐長於中國亂亡
之際歷五代百戰之煙塵而能保其上世之詩書不改
其馮掖之舊若仕則吾不能彼親舊必以聘我則從之
亦不能久我也實生三子其誠孝直方一德猶一人也
特其仲子文元公達而顯於朝伯侍郎公季尚書公不

達則在鄉黨郡國為顯人也惟我三祖同德而同慶後
之子孫亦均被其澤公祖尚書公不忘文元公之典型
尚文莊公之珪璋使公壽而仕必克顯矣視其晚暮以
年格僅釋褐不亦傷乎說之不肖竊以謂夫子特與魯
子論孝之後羣弟子乃起而各有問焉不然羣弟子之
舊聞夫子有語於魯子者亦春秋之常事也孰知孝德
之辨深矣哉惟神明其意默不待問者魯子之孝也意
已至而德未安必待問焉者羣弟子之孝也恭惟公之

德備矣特歸之於孝而得魯子之孝者也公勤於壽光之封乃以鄉里小兒之所欲而謹欲之不知於吾親吾學果何如也殆類彩衣仆而兒啼者乎因壽光之封而論晁氏之積善豈不本原之哉乃遠不自於中令以基之侍郎文元公尚書以崇之文莊公以大之則曷以知公德之所植哉松生古澗千尋之底而不試自與清風期也卒政和五年四月二十日年五十九葬濟州任城縣諫議鄉魚山實其十一月丙寅娶鄭氏男三人端規

端矩端準女八人壻曰迪功郎東道總管司幹辦公事
張表臣承直郎京東東路安撫司幹辦公事龐遜孺登
仕郎閭丘公肅進士閭丘公禧進士閭丘公達三早逝
孫男三人宗之勝之曦之孫女一人公之三子聞母夫
人訓曰尚德而傳可久者文也時無其選猥命說之表
公之墓固不敢言文而亦知歎曰公如得以卿大夫之
孝輔本朝以孝治為家法之隆上尊吾君宗廟之榮下
永百姓父子之慶則其在晁氏者可忘言矣又何敢辭

建炎二年九月九日族姪孫中奉大夫充徽猷閣侍制
提舉杭州洞霄宮說之謹述

墓誌銘

江子和墓誌銘

君諱端禮字子和一字季恭始江氏自漢轅陽侯德為
陳留圉城人祖諱休復仁宗時修起居注有重名考諱
懋相朝散郎子和生而沈粹年十七遊太學為同輩敬
憚獨裕然不肯就公試或試則居上列常嘆曰是不足

學也令人慙耳方是時東坡謫居黃州子和特傾慕之
以書講學焉子和於一世德名人皆願從之遊聞人毫
髮之善汲汲稱道惟恐不及蓋自其舍人之風流為然
子和學詩律於黃魯直論經行於徐仲車為尤謹二公
俱以子和為賢此二公者他人或不能並善其家法也
方舉世不為春秋之學時有六合崔子方伯直者世莫
知其為人子和一見而定交曰此吾之所學也願與子
共之伯直遂因子和得名於諸公間子和之志行遠矣

哉其事親孝能色養教二弟必欲與已同善然諾謹於僕妾不侮乎童稚終日在閤室無惰容如天使而壽且仕官得時為祭酒為御史大夫勸講金華則優矣不幸年三十有八以紹聖四年七月二十三日疾不起娶王氏能為子和躬勞苦先子和卒再娶張氏子男三人女二人其二弟端友端本今俱以文行稱二弟裒子和之遺藁為集若干卷子和嘗病柳子厚作非國語乃作非非國語東坡見之曰久有意為此書不謂君先之也魯

直則曰子和文辭簡理似尹師魯以宗寧五年五月十五日從葬于陽夏先墓之次崔六合為行狀黃州潘邠老欲銘之而邠老卒宛丘張文潛又欲為銘會文潛病不果說之亡弟微之光道與子和早相善因得子和在兄弟間乃為之銘曰

天何為哉嘻善士植植方茂忽以逝不使究極能厥世或如好之聊嬉戲彼頑兇狠天亦畏一既生之莫敢斃又且富貴如其志子和九原何所遺漢轅陽侯百世嗣

壽昌縣君劉氏墓誌銘

齊安江使君諱懋相之繼室曰壽昌縣君實墨莊劉氏也皇考司封員外郎諱啟司封之從父兄翰林侍讀學士作春秋劉氏傳者當時以字稱之曰劉原甫江隣幾至今聞之者凜然有生氣夫人劉原甫侍讀家女嫁為江隣幾舍人之子婦其耳目聞見孰非名教禮度事加之夫人天資靜密醇素真如夫人上世所稱古列女也哉然夫人猶恨歸江氏時舍人捐館已久曾不及一日

之養每遇荐新享歲事則未嘗不感惻加敬折旋於爨
燭戶牖間自移其事生之意以為禮文也有故老能談
舍人及永嘉郡夫人舊事細及起居狀則夫人謹事其
語以之輔佐使君教諸子曰是江氏家法也願共守之
不懈使君罷官青龍邑民獻果衷藉黃金以使君命納
舟中夫人視之驚曰此何物頃使君來詰其故乃更數
政不得直之冤訟來謝耳遽并斥之使君卒齊安吏民
合賻甚厚夫人涕泣曰豈徒吾心有不可耶將不恥使

君平生之操歟吏民相與歎息徘徊莫得其涯而前夫
人自少衣綸翟珥不肯華侈逐時好其言動若有尺寸
可繩墨不忒朝夕平居一室斂足正坐凝然終日更袞
暑儀容亦甚整如對嚴賓而陰議論皁白一時士大夫
殺如也自使君卒其家事則或不專焉必諸子之待曰
吾有子賢夫人實能器其子而責之甚遠盖夫人之識
度然也端友等一日白夫人曰幸見聽敢有言夫人笑
曰不欲從科舉乎是吾素已疑之矣且汝兄力學能文

屈於有司者二十年嘗為余言有司待士之禮薄而法
益苛愧之終其身汝等尚少而亦能不樂於此乎第汝
安則吾何有以故端友與其季端本俱遂優游於園城
數畝之田人多高之夫人年六十有九崇寧五年四月
戊子以疾卒五月戊申祔陽夏先塋使君之墓速葬亦
夫人平昔之志也男三人長端禮早卒次即端友端本
女三人亦皆令淑宜其夫家既葬端友哭曰吾母曾參
范滂之母也人或言我非夫人之子我不知我與季有

異同於吾母也既而得其所生陳於京師且言兒生甫三歲媼去江氏今三十年矣端友於是哭益哀殆不勝喪求其宜銘者說之大父金紫與舍人同館相善實奕世之好乃為之銘曰

周道既衰闕睢思古漢至更生乃傳列女寧自知其後世真有顯家之媛如當時之所序墨莊之榮耶圍城之興耶是實儀範海內為婦為母顧惟祔我賢使君越百有千年不得而稱之曰江母之墓

宋故朝請大夫管句舒州靈仙觀騎都尉段公

墓誌銘

公諱與言字彥昌始段氏得姓自段干木之後徙武威
為武威之段世以忠武有聞人漢金城太守會宗太尉
秀實其遺風又特高矣唐禮部郎中蘇州刺史同泰始
為滎陽中年人公之先晉天福中自渾河川內徙為汴
人公皇考光祿卿贈太尉聿葬公皇祖三班借職閬州
監押贈監門大將軍重進于鄭又復始為鄭人公從光

祿任為太廟齋郎調嘉州龍游縣尉終更就辟尉犍為遷成州軍事推官再佐文州改宣德郎知河中府猗氏縣轉通直郎賜五品服有勲官監延安府折博務轉奉議郎勲亦一轉今上即位覃恩轉承議郎通判邠州軍州事又倅耀州餘年自謂不任事乞閑得管句舒州靈仙觀凡以賞官五轉至朝散大夫勲三轉至騎都尉大觀三年三月乙巳暴得疾卒于鄭年七十歲公為人質愿廉毅非有意於寡言慎行而天資不以利欲自遷而

然俸俸輓輓終日若無所與於人間者人於公始以難
親而忌之卒服其常而畏且譽之公既以是有家而其
居鄉黨從宦蒞政無險夷率一軌轍而未嘗軒輊也隼
為有沐川蠻酋欲以譯官失職為亂遠近驚駭公曰何
害匹馬走溪洞喻之曰譯官一日信有罪矣其如朝廷
百年恩德何蠻酋相率感慟而去公即丁內艱嘉人念
公貧無以遠歸率賻甚厚公謝之再三曰非孝子待死
之志也卒不受一錢公在成州時元豐間有靈武之役

使者委公掌兩川金幣于鳳翔以佐軍實有司以朱墨
無前比環視不知所出公獨閑暇先會其大數若干而
前期枚處以待之彼執券劑譁然聲軍法來者乃拱手
有德色而去猗氏之政尚嚴而終不失古良吏之風常
以謂政事莫先於務農躬視種植之法及公受代而田
野桑榆滿矣人稱之曰段公林邠若耀皆環慶之衝西
陲勁兵襟帶也公謹其倉庾而仁之進築木瓜堡無一
人亡者公平居敝衣糲食無所嗜好每觀光祿翰墨遺

簡則有綵衣兒啼之色若其親之存者此則反乎古人
不讀其父手澤之說而同歸於孝也公娶王氏初封仁
和縣君再贈長興縣君先公十有四年而卒子三人宏
假將仕郎宋三班奉職環慶路第八隊將安尚幼三女
長適承議郎通判揚州軍州事喻齊次適奉議郎知開
封府咸平縣陳天錫次適假將仕郎張禠孫男五人女
四人皆幼宏等卜以六月甲申葬公于鄭州管城縣懷
忠鄉青店里先塋之次禠實說之自出也狀公平生來

乞銘銘曰

有猗其枝有清其陰誰其思矣段公之林寧獨猗氏所
戾謳吟問何致然前修是欽段氏世家誠信不疑輕兵
深入定小昆彌老斃持馬撫邠亂師公之為政敢不肖
之鄭實故里鳩杖歸來謂宜百齡忽其逝哉兆宅是安
嵩隗崔嵬篆此銘章究彼孔哀

王立之墓誌銘

士而憂心苦思矯矯然不勝朝夕之憤而初不為其身

之私者古多有之顧今豈亦乏人哉晉國王子野質爲人清苦純淡視世事若無一可以動其心者惟以善人君子亨否爲已休戚以故其仕屢斥抱羸病而卒河南尹子漸剛毅之士也或有不當其意者子漸嘆息憂悲發憤謂生可厭而死可樂往往哀歌泣下無幾何而卒今城南王立之直方非有慕於此二人而性義實似之也立之仕宦視二人不及遠甚不足爲立之道而子漸卒時年五十歲子野卒年四十五歲而立之之卒又少

子野四歲是又為二人而窮者歟立之少知自好樂從
諸丈人行遊其間見日博而日勵欲自置于聞人中其
得四方朋友日益加盛且多喜稱譽立之者立之於朋
友之善固自一毫不掩也立之無他嗜好惟晝夜讀書
手自傳錄凡大編數十時遐荒窮海有先生居焉立之
身不出京師而傳彼所賦歌詩獨早且多若與彼咫尺
居而手相授也立之於人顧豈燥濕寒暑之異哉然非
其所好雖以勢利美官誘致之莫肯自枉也立之雖有

先人園以居而衣食才自給耳每有賓客至則必命酒
劇飲抵談終日無不傾盡若其大有力而饒於用者由
是立之好士之名得於遠邇客有遊京師而不見立之
則以為恨已立之嘗以假承奉郎監懷州酒稅尋易冀
州糴官亦僅累月投劾歸侍而不復更出矣凡十五餘
年處城隅一小園中而笑傲自適如一日焉命其園中
之堂曰賦歸亭曰頓亦有足以見其志云一時文人多
為之作賦歸等詩立之視朋友死喪疾病力窮勢竭而

無厭倦意彭城陳無已卒于京師立之賻弔而割田十頃以周其孤多此類者立之得風痺病踰二年而家事日零落賓客來相問訊者幾希嗚呼可不惜哉立之病中取其平生書籍圖畫古器散之四方朋友無遺則其拳拳慕義樂善獨隆如此此事殆古人所未有也立之高祖諱顯祖諱仁皆國史有傳曾祖諱希逸故任尚書祠部員外郎直史館贈司空父諱械故任供備庫副使贈金吾衛大將軍娶定安郡王宗絳女遂昌縣君再娶

宋莒公之孫女二子曰恂曰穀女四人長適諸王孫士
德孫女一人立之大觀三年三月丙寅卒卜以四月甲
午祔二夫人葬于河南府密縣義臺鄉進節村先塋之
次立之病卧久說之歸自關中過其門往問焉形骸非
平日立之而口不能良言或艱出一語猶慷慨忠憤不
少憊也且曰我有所作詩文他日無咎序之死則以道
銘我是不可不銘銘曰

蹈滄海深山蹇產苦辛以求厥志兮孰知有高風容與

都城之士或輶擊車摩於聲利之塗以為口腹之利兮
孰與壺觴不徙席而卒歲彼不朝夕或疵或癘或躓或
劓兮又孰若令名芬芳乎來裔

文安縣子碩人范氏墓誌銘

太碩人范氏秀州華亭人父故任光祿卿贈開府儀同
三司諱仲模母胡氏安定郡君追封榮國夫人榮國卒
時碩人年十有四歲能紀綱家事憐其弟幼而厚撫之
輒自喜讀書如成人開府每歎曰若為男子范氏其不

興乎歸吳郡陸氏歷戶部侍郎終寶文閣侍制諱師閔
嘉祐中侍郎之父太尉公諱誥方被寵榮門戶盛矣然
貧於清也顧人之初為陸氏婦既不矜其榮華又亦不
厭其貧至瘠已以為宗族之腴其後太尉公與其姑昌
國太夫人不起疾侍郎持使節坐謫籍中家人亦莫知
其貧而各職其分者顧人素能貧之力也未幾侍郎出
入顯榮疑若可豐以入時好者顧人曰何物能易吾之
素耶乃率是志教諸子論語毛詩皆其口所指授而諸

子易以立諸女相與雞鳴而起曰可不勉哉吾母如何
吾曹當如何大觀二年二月甲午卒於子長安官舍年
六十有九或曰碩人晚學佛疾病時顧左右曰吾觀華
嚴經前日至第十八卷若其為我終之語竟而卒是則
搢紳先生難言也男四人方彥磁州滏陽縣主簿先碩
人十九年卒孚彥朝奉郎惇彥承議郎碩人卒後八年
相繼而卒欽彥奉議郎旬當在京諸司糧料院女四人
壻曰承議郎監在京左藏庫岑穰奉議郎韓琥朝請郎

權發遣興化軍府王傑朝請郎晁詠之孫男五人旦假
將仕郎曷假承務郎旻登仕郎是早皆將仕郎孫女一
人欽彥卜政和七年十月甲子自開封侍中之墓改葬
于鄭州新鄭縣旌賢鄉禮也太碩人政和四年追封也
初以元豐四年封德安縣君云銘曰

春葩方榮以傲風雨有實必異碩人為女既其有行蘋
蘩夙莫不侈其貧碩人為婦吾兒詩書吾女管縷吾髮
皤然碩人為母生名房閨死傳區宇新阡彌吉吾銘敢

侮

承議郎陸公墓誌銘

君諱惇彥字德充吳人自其祖徙開封曾祖工部郎中
直史館贈工部尚書諱若冲祖龍圖閣直學士右諫議
大夫贈太尉諱詵父朝請郎充寶文閣侍制贈正奉大
夫諱師閔母碩人范氏德充生而沈厚寡笑言元豐中
侍制使蜀德充尚幼也閉門謝諸少年讀書至達旦非
母夫人為之撤燭則不止長遊太學猶在蜀時獨處也

以王氏詩再試禮部紹聖元年乃以辭賦中第調懷州武陟縣主簿侍郎帥秦遂管勾書寫經略安撫使機宜文字隨府罷調京兆府藍田縣主簿侍郎帥雍改鳳翔府藍屋縣主簿遷瀛州防禦推官知澶州濮陽縣丞辟監解州解縣鹽池兼知縣事未赴丁外艱除喪為從事郎辟陝西路轉運司勾當公事累遷承直郎丁內艱除喪遷奉議郎為潁昌府司兵曹事未赴除監在京作坊物料庫遷承議郎政和五年六月戊申以疾卒年四十

有七德充居喪類子羔官非其所宜尚何可為德充道者方德充無恙時自所鄙而不有之矣在陝西有三中貴人競興功利誠云博矣人不自重皆以必進滿意金帛爵秩德充迺獨惴不敢前部使者怒之檄辦積石軍須德充即日上道羣秦隴岐鳳階成之民與共辛苦委曲利害以告之民始悟前日之非是相率以力期會欣然見之者曰自軍行來未之或有也德充形儀不適時好以謂必多不如律令其繩墨不遺纖芥卒德之異於

他人嗟夫德克而少施設宜如何哉娶榮氏安武軍節
度推官存道之女榮卒時德克年甫四十而蕭然獨擅
一室目未嘗留色以至終身雖深山習道之士不是過
也男一人旦從祖任將仕郎秀穎可喜識者交譽之曰
德克必有是子也德克卒未踰年旦亦卒年二十二歲
德克弟欽彥呂政和七年十月甲子改卜考妣於鄭州
新鄭縣旌賢鄉德克乃葬其壬穴欽彥來求銘於說之
說之初見君長安曰吾鄉里姻婭之人也後數年見君

於京師稍往來乃歎曰德充瑚璉宗廟之器也又二三年復見君京師往來益密歎曰赤刀河圖國器也我將築室箕顓之間相與講學躬耕者非斯人耶奈何今舍我而死耶竊惟廬山劉道原之為人賢饑寒而不得衣之食之者太尉公帥桂時辟道原從事溫公嘗稱之矣則宜其門中有人物如此彼壽夭窮達則君子不敢知銘曰

山鬼降兮鱗飯何所施兮瑚璉紛羣巫兮雞卜彼河圖

兮自遠吾敢忝兮厥祖不我壽兮踵武吾何恨兮有子
又誰奪兮弗與可使絕兮不世何可毀兮大器彼斯世
兮壽夭億萬年兮誰嗣吾自得兮本末又何有兮窮達
嵩隗望兮新阡鬱吾銘兮不沒

宋故承議郎知楚州張公碩人范氏墓誌銘

文正范公有子三人重望在巖廊威聲在疆場大夫學
士因得以窺文正公之鋒穎棣棣然如文正公之生不
沒也或以實德經濟或以雅量表儀或以鴻才光輝公

有季女或瞻於兄弟間豈不是似也哉其年十有六既孤之五年也嫁康節張公之季子諱琬元祐間以承議郎知楚州捐館時家故貧夫人晚乃有田幾百頃夫人幼女嫁宋景文諸孫頤年者同邑居未嘗私以一錢非儉也而卒莫能躡其所以富之術每遇事倉卒酬酢間暇有餘地不其才似耶夫人三子威戢成先後卒於官夫人臨喪豈不及禮而哭之不過乎情晚在內寢哭宋氏女亦知制他事尚何能摧之者威卒江外歸帆一日

風浪不沒者寸許夫人中自若慰其衆人曰吾父吾舅
陰德在人可恃無恐不其量似耶張氏內外百口畏夫
人殆不敢平視戢之妻乃夫人之弟龍圖公之女也夫
人不須更假以色前是教其亡長女嫁韓忠憲諸孫璉
者必極其內外家法而夫人終始自律其身平居不墮
掃如齋德亦似哉文正公於姑蘇建范氏義莊聞天下
夫人抱病久苦辛呻吟中思為張成義莊終不辱其先
正也夫人則曰是楚州之志云其在嘉祐間康節公參

知政事夫人錫命服後以夫恩封壽光縣君繼以兄丞相恩特封和義郡君晚以例易碩人病不起於政和八年七月壬寅年七十有七服齊衰三年威之子祺與諸弟穎種稔兼祫卜明年二月甲申祔楚州之墓求銘於嵩山晁說之固辭之不能銘曰

昔者范張雞黍之期者不遭時之君子言行之私也今之范張盟以忠義申之婚姻既續既緒者遭時之君子風化之宜也為女為婦生而榮死而安後人之誦者餘

化之施也

景迂生集卷十九

謹案第一頁後二行臯文思敏疾原本缺臯文二字據漢書揚雄傳及西京雜記補

第三頁前六行離俗獨處原本闕俗字據揚雄逐貧賦補

第四頁後三行長與汝居原本脫汝字據逐貧賦增

第七頁前四行茹芝英以禦餓兮原本餓訛肥據太玄賦改

第九頁前三行黃金十斤原本十上行五字據漢書及前漢紀刪

第九頁前六行又易倉頡字之重複者原本脫又易倉頡四字據漢書藝文志增

第十頁前三行欲得其最目原本脫目字據劉歆與楊雄求方言書增

第十頁前八行不能經年精銳以成書原本脫不字據劉歆書增

第十一頁後六行其不勞戎馬高車原本脫不字
據揚雄答劉歆書增

第十三頁前七行吾真得嚴君平為吏矣原本吏
訛惠據荀悅前漢紀及華陽國志改

第十四頁前四行有賣錢千萬原本脫此五字據
論衡佚文篇改

第十六頁前四行宜少貶以圖榮進原本脫圖字
據宋史李之才傳增



總校官庶吉士臣侍朝

校對官中書臣王鍾泰

謄錄監生臣熊瀛